

**13.07.2010 – Ried vum Claude Adam zum Gesetzesprojet iwwert d'Formation vun den Infirmiers, Infirmièren an déi vun den Hiewammen.**

**(Séance publique 43, Compte rendu 17, Page 614)**

**6154 - Projet de loi portant organisation de la formation à la profession réglementée de l'infirmier responsable de soins généraux et de la formation de sage-femme**

**M. Claude Adam** (*déi gréng*).- Merci, Här President. Dir Dammen an Dir Hären, wann ee wëllt den Zuch kréien, da gëtt et zwou Méiglechkeeten: Entweder et leeft een op d'Gare oder et geet ee mat Zäit fort. Mir wieren am Fong geholl éischer der Meenung, et wier besser, mer géife mat Zäit fortgoen, well dann ass ee méi sécher, datt een dat erreecht, wat ee wëllt, an et brauch ee sech net ze iwwerstierzen um Wee dohinner. Mir...

**M. Mars Di Bartolomeo**, *Ministre de la Santé*.- Wann ee schonn am Zuch sëtzt, dann ass et egal.

**M. Claude Adam** (*déi gréng*).- Dat ass richtig.

**(Hilarité)**

Da muss een allerdéngs och laang Been hunn an e gudden Otem, fir datt een den Zuch nach kritt, Här Minister.

**(Interruptions diverses)**

**M. le Président**.- Här Adam, loosst lech net duerjernebréngen! Fuert Dir roueg virun!

**M. Claude Adam** (*déi gréng*).- Merci, Här President. Eigentlech hätte mer de Mëtteg, wéi mer gefrot hunn, fir de Projet iwwert d'Bourssé vum Ordre du jour ze huelen, datselwecht misse bei dësem Projet froen. Well och hei hate mer, wéi mer de Rapport votéiert hunn, keen Avis do, ausser dee vum Statsrot. Och hei hu mer vun der Regierung erëm eng Kéier gesot kritt: „Majo, et gëtt eng gewëss Urgence.“ An d'Urgence ass den Avis motivé, deen allerdéngs scho vum Oktober 2009 ass. An esou hu mer och hei am Fong geholl net déi wäitgehend Diskussioun gefouert, déi et awer och hei derwäert gewiescht wier fir ze féieren.

Et gëtt verschidde Vuen zu dem Infirmiersberuff an och zu der Sage-femme. Hei si Professions réglementées. Dat heescht, déi Beruffer erlaben eng grouss Mobilitéit an Europa. Déi gi vun all Land unerkannt. An déi Vuë vum Ministère a vun der Kommissioun sinn an der Vergaangenheet relativ wäit auserneegaangen. Wann ee kuckt, de Statsrot huet dat opgefouert, datt mer bis elo eng Formatioun

hate vun dräi Joer an 3.460 Stonnen. An d'Kommissioun freet dräi Joer oder 4.600 Stonnen, woubäi d'Interpretatioun dann eben ass, déi 4.600 Stonne mussen erfëllt ginn.

Et ass allerdéngs net nëmmen d'Vue vun der Kommissioun. Et ass och eng ganz laang Fuerderung vun den Infirmieren an den Infirmière selwer, an esou ass et fir eis och net ganz verständlech, firwat datt mer da wierklech eis esou laang gewiert hunn an esou laang gewaart hunn, a schlussendlech huet et dann an der Kommissioun geheescht: „Der Klügere gibt nach“, an du si mer dann op de Wee gaang fir hei an enger Rekordzäit - d'Madame Rapportrice, där ech iwwregens Merci soe fir en ausféierleche Rapport, souwuel dee mëndleche wéi dee schrëftlechen, huet da gesot: „Majo, mir hunn dat a Rekordzäit gemaach.“ Den Dépôt war den 2. Juli; de Vote ass haut den 12. Juli.

Dobäi hat, just zur Erënnerung, de President vun där Kommissioun, wou mer deen hei Projet diskutéiert haten, den honorabelen Här Thiel, mat sengem Rapport, mat senger Interventioun, wéi mer iwwert d'Boursse geschwat hunn, un d'Adress vun der Regierung gesot: „Dat war esou séier gaang. Kommt net méi esou erëm!“ An zack si mer schonn erëm esou do.

Ass eng Fro, déi an eisen Aen awer och ganz berechtigt ass; mir hunn elo an Zäit vun zéng Deeg de Projet vum Dépôt bis zum Vote bruecht: Ass d'Schoul och prett? Déi ganz Reform vun der Formation professionnelle misste mer eigentlech an d'Hänn vum Här Biltgen leeën an den Hänn vun der Madame Delvaux ewechhuelen. Well viru 14 Deeg hu mer hei festgestallt, datt mer an där Reform vun deene ganz ville Beruffer, wou mer missten de Profil erschaffen, der just 18 fäerdeg haten, a mir hunn eisen Aufschub vu bis zu zwee Joer ginn.

Allez, hop! Ech mengen, eisen Turbominister, deen hätt déi ganz Reform an där Zäit duerchbruecht. E wénkt jo och, e schätzt dat och esou an.

### ***(Interruption)***

Gi mer awer vläicht méi seriö. Mir fannen natierlech och eng Rei positiv Saachen un deem Projet hei, zum Beispill, datt mer bei eis effektiv och mat der Treizième ee Bac ausstellen. Ech hoffen, datt dat gekläert gëtt, déi Fro, déi d'Madame Brasseur an d'Chambre des Salariés opgeworf hunn. An der Kommissioun hu mer dat esou diskutéiert.

Mir fannen dat och gutt, datt mer de Schüler d'Méiglechkeete ginn, e Bac no där Treizième ze kréien. Dat mécht d'Dier op fir eng ganz Rei Beruffer am medezineschen a paramedezinesche Beräich.

Selbstverständlech ass déi Fro vun de Revendications financières eng ganz interessant Fro. D'Diskussioun, wéi gesäit et dann an Zukunft mat de Gehälter aus, an do muss een dann och soen, mer schwätzen alleguerte vun deene flotten, wichtege an an Zukunft nach méi wichtege Beruffer vum Infirmier a vun der Infirmière. Mir sinn awer net bereet, effektiv och eng Carrière fir déi Leit ze schafen.

Mir schafen en Diplom, mir wäerten en Diplom op. Mä mir maachen awer net gläichzäiteg eng Carrière beim Stat. A fir eis wier et och ganz interessant gewiescht, eng Diskussioun ze féieren: Firwat? Wat schwätzt dergéint fir, besonnesch emol, fänke mer emol bei deem un, wou et vläicht zueleméisseg net esou grouss ass, bei der Sage-femme, fir do och effektiv e Bachelor ze maachen?

Mir schwätze vill vum Bologna-Prozess. Wahrscheinlech hätt dat och nach eng Rei Méiglechkeeten erlaabt. Et gëtt och Länner, et gëtt der vläicht net vill, mä et gëtt och Länner, wou d'Sage-femme a wou den Infirmier an der Formatioun vun engem Bachelor gemaach gëtt.

Wéi gesot, dat sinn interessant Diskussiounen, déi een nach hätt kënne féieren. Mir waren ënner Zäitdrock a mir bedauern am Fong geholl, datt mer net méi fréi op souwuel de Message vun de Leit aus dem Beruff wéi op d'Kommissioun reagiert hunn. Mir hätten do kënne nach vill Aspekter erabrénge. An duerfir stëmme mir de Projet net. Mir wäerten eis wéinst deene Froen, déi nach alleguerten op sinn, beim Vote enthalen.

**M. le Président.**- Merci dem Här Adam. Als leschte Riedner ass den Här Colombera agedroen. Här Colombera, Dir hutt d'Wuert.